

四庫全書

集部

欽定四庫全書

集部  
唐詩鏡卷五十三

詳校官庶吉士臣范逢恩

主事銜臣徐以坤覆勘

總校官編修臣王燕緒

校對官主事臣吳紹昱

謄錄監生臣張大鼎

欽定四庫全書

唐詩鏡卷五十三

明陸時雍編

晚唐第五

方干

字雄飛新定人張公元即其外王父也一云歙人

鑑湖恣態山墅時號方處士嘗謁廉倬誤三拜人稱方三拜將薦而卒門人謚玄英先生集十卷

五言律詩

經周處士故居

愁吟與獨行何事不傷情久立釣魚處唯聞啼鳥聲山  
蔬和草嫩梅柳入籬生吾在茲溪上懷君恨不平

三四韻  
趣雅

送姚合員外赴金州

受詔從華省開旗發帝州野烟新驛曙殘照古山秋樹  
勢連巴沒江聲入楚流惟應行化後吟句上雲樓

七言律詩

除夜

玉漏斯須欲達晨四時吹轉任風輪寒燈短燼方燒臘  
畫角新聲已報春明日便為經歲客昨朝猶是少年人  
新正定數隨年減浮世唯應百遍新

語氣  
溜亮

旅次揚州寓居郝氏林亭

舉目縱然非我有思量自在故山時鶴盤遠勢投孤嶼  
蟬曳殘聲過別枝涼月照窻欹倦潑泉遶石泛觴遲  
青雲未得平行去夢到江南身旅羈

附遊張公洞下蒸陰氣松蘿濕  
外制溫風杖履寒下句有異

七言排律

許員外新陽別墅

蘭汀橘島映亭臺不是經心即手栽  
滿閣白雲隨雨去一池寒月逐潮來  
小松出屋和巢長新徑通村避笋開  
柳絮風前欹枕卧荷花香裏釣魚回  
園中認葉分靈草簷下攀枝落野梅  
莫恣高情求逸思須防急詔用長才  
若因螢火低殘卷便把漁歌送幾杯  
多謝郢中賢太守

常時談笑許趨陪

七言絕句

將歸湖上留別陳宰

歸去春山逗曉晴  
縈迴樹石罅中行  
明時不是無知己  
自憶湖邊釣與耕

與徐溫話別

去去何時却見君  
悠悠烟水似天津  
明年今夜有明月  
不是今年看月人

君不來

遠路東西欲問誰  
寒來無處寄寒衣  
去時初種庭前樹  
樹已勝巢人未歸

曹唐

字堯賓桂州人為道士太和中舉進士累為諸府從事因暴疾卒于家有集三卷

七言律詩

仙子洞中有懷劉郎

不將清瑟理霓裳  
塵夢那知鶴夢長  
洞裏有天春寂寂  
人間無路月茫茫  
玉沙瑤草連溪碧  
流水桃花滿澗香



曉露風燈零落盡此生無處訪劉郎

是為  
平調

七言絕句

小遊僊詩

玉簫金瑟發商聲桑葉枯乾海水清  
淨掃蓬萊山上地  
畧邀王母話長生

玄洲草木不知黃甲子初開浩劫長  
無限萬年年少女  
手攀紅樹滿殘陽

酒釀春濃瓊草齊真公欲散醉如泥朱輪輶輶入雲去  
行到半天聞馬嘶

白石山中自有天竹花藤葉隔溪烟朝來洞口圍碁了  
賭得青龍直幾錢

海水西飛照栢林青雲斜倚錦雲深水風暗入古山葉  
吹斷步虛清磬音

玉詔新除沈侍郎便分茅土鎮東方不知今夕游何處  
待從皆騎白鳳凰

饑即餐霞悶即行一聲長嘯萬山青  
穿花渡水來相訪珍重多才阮步兵

九天天路入雲長燕使何由到上方  
玉女暗來花下立手按裙帶問昭王

玉色雌龍金絡頭真妃騎出縱間遊  
崑崙山上桃花底一曲商歌天地秋

西漢夫人下太虛九霞裙幅五雲輿  
欲將碧字相教示自解盤囊出素書

汗漫真遊實可奇  
人間天上與人知  
周王不信長生話  
空使萋弘碧淚垂

芝蕙芸花爛漫春  
瑞香烟露濕衣巾  
玉童私地誇書札  
偷寫雲瑤暗贈人

鶴叫風悲竹葉疎  
誰來五嶺拜雲車  
人間肉馬無輕步  
踏破先生一卷書

共愛初平住九霞  
焚香不出閉金華  
白羊成隊難收拾  
喫盡溪頭巨勝花

酒盡香殘夜欲分  
青童拜問紫陽君  
月光悄悄笙歌遠  
馬影龍聲歸五雲

叔卿適覽九天春  
不見人間故舊人  
怪得蓬萊山水下  
半成沙土半成塵

欲飲罇中雲母漿  
月光裏合笙簧  
更教小奈將龍去  
便向金壇取阮郎

昨夜相邀宴杏壇  
等閒乘醉走青鸞  
紅雲塞路東風緊  
吹破芙蓉碧玉冠

雲鶴冥冥去不分  
落花流水恨空存  
不知玉女無期信  
道與留門却閉門

太一元君昨夜過  
碧雲高髻綰婆娑  
手擡玉策紅於火  
敲斷金鸞使唱歌

瓊樹扶疎壓瑞烟  
玉皇朝客滿花前  
東風小飲人皆醉  
短尾青龍枕水眠

沙野先生閉玉虛  
焚香夜寫紫微書  
供承童子閒無事  
教判瓊花餵白驢

青苑紅堂壓瑞雲月明閒宴九陽君不知昨夜誰先醉  
書破明霞八幅裙

王建宮詞百首曹唐遊仙九十八首  
皆對境生情令人有如在當年之趣

李昌符

字巖夢咸通四年  
進士歷尚書郎

五言律詩

秋中夜坐

空庭吟坐久爽氣入荷衣病葉先秋落驚禽背月飛瘴  
雲情未散戍客老將依為應金門策多應說戰機

尋僧元皎因贈

此僧迷有著因病得尋師  
話盡山中事歸當月上時  
高松連寺影亞竹入窻枝  
閒憶草堂路相逢非素期

三四  
遠俗

題友人屋

松底詩人宅閒門遠岫孤  
數家分小徑一水截平蕪  
竹節偶相對鳥名多自呼  
愛君真靜者欲去又踟躕

三四有盛  
唐王孟風



七言律詩

秋夜作

數畝池塘近杜陵  
秋天寂寞夜雲凝  
芙蓉葉上三更雨  
蟋蟀聲中一點燈  
跡避險巇翻失路  
心歸閒澹不因僧  
既逢上國陳詩日  
長守林泉亦未能

三四清歷  
不乏景趣

附許崇新年呈友  
一月月相似  
一年年不同  
清晨  
窺古鏡  
旅貌近衰翁  
處世間難得  
闕身事半空  
浮生  
能幾許  
莫惜醉春風  
起二語中  
唐人如此  
琢句爭之  
小技間耳

來鵬豫章人大中咸通間舉進士不  
中客死于維揚有詩集傳於世

七言律詩

寒食山館書情

獨把一杯山館中  
每經時節恨飄蓬  
侵階草色連朝雨  
滿地梨花昨夜風  
蜀魄啼來春寂寞  
楚囚吟後月朦朧  
分明記得還家夢  
徐孺宅前湖水東

清明與友人遊玉粒塘莊

幾宿春山逐陸郎  
清明時節好烟光  
歸穿細荇船頭滑

醉踏殘花屐齒香風急嶺雲翻迴野雨餘田水落方塘  
不堪吟罷東回首滿耳蛙聲正夕陽

胡曾

長沙人咸通中舉進士不第嘗為漢南節度從事有詠史詩一卷安定集十卷行世

七言絕句

詠薛濤

萬里橋邊女校書枇杷花下閉門居掃眉才子知多少  
管領春風總不如

語趣  
風騷

細腰宮

楚王辛苦戰無功  
國破城荒霸業空  
唯有青春花上露  
至今猶泣細腰宮

西園

月滿西園夜未央  
金風不動鄴天涼  
高情公子多秋興  
更領詩人入醉鄉

潯沱河

光武經營業未興  
王郎兵革正憑陵  
須知後漢功臣力

不及滹沱一片冰

晚唐人多以意見撐  
持此非詩家正脉

瑶池

阿母瑶池宴穆王九天仙女送瓊漿漫矜八駿行如電  
歸到人間國已亡

成都

杜宇曾為蜀帝王化禽歸去舊城荒年年來叫桃花月  
似向春風訴國亡

附馬陵 陸梁蕭蕭九月天驅兵獨過馬陵前路傍古木蟲書處記得將軍破敵年 小作意

公乘億

字壽山咸通宏詞進士第有珠林集一卷見藝文畧

五言排律

賦得臨江遲來客

江上晚沈沈烟波一望深向來殊未至何處擬相尋柳結重重眼萍翻寸寸心暮山期共眺寒渚待同臨北去魚無信南飛鴈絕音思君不可見使我獨愁吟

柳結二語好托喻語亦趣饒

張喬

池州人咸通中京兆府解試首薦唐書昭宗大順進士黃巢亂遂與伍喬之從隱九華有集二卷

五言律詩

浮汴東歸

日暖泗濱西無窮岸草齊薄烟衰草樹微月迴城鷄水  
近滄浪急山隨綠野低羞將舊名姓還向舊遊題

三四語  
色細嫩

再題敬亭清越上人山房

重來訪惠休已是十年遊向水千松老空山一磬秋石

窻清吹入河漢夜光流久別多新作長吟洗俗愁

老氣

和薛監察題興善寺古松

種種近王城前朝古寺名瘦根盤地遠香吹入雲清鶴  
動池臺影僧禪雨雪聲看來人旋老因此歎浮生

七言絕句

宴邊將

一曲梁州金石清邊風蕭颯動江城座中有老沙場客



橫笛休吹塞上聲

劉象

七言絕句

春夜

幾處干戈阻路岐  
憶山心切與山違  
時難何處披懷抱  
日日日斜空醉歸

曉登迎春閣

未柳憑闌睇錦城  
烟籠萬井二江明  
香風滿閣花盈戶

樹樹樹稍啼曉鶯

唐彥謙

字茂業并州人咸通末進士僖宗乾符末避亂漢南王重榮辟為河中從事歷晉絳二州刺史

後為閬壁二州刺史卒號鹿門先生有集三卷

七言律詩

興元沈氏莊

清淺縈紆一水間  
竹岡藤樹小躋攀  
露霑荒草行人過  
月上高秋宿鳥還  
江遠武侯籌筆地  
雨昏張載勒銘山  
異鄉一笑因酣醉  
忘却愁來鬢髮斑

五言絕句

小院

小院無人夜烟斜月轉明清宵易惆悵不必有離情

語却  
真

七言絕句

詠柳

惹絆風光別有情世間誰敢鬪輕盈楚王江畔無端種  
餓損宮腰學不成

仲山

千載遺蹤寄薜蘿沛中鄉里舊山河長陵亦是閒丘隴

今日誰知與仲多

司空圖

字表聖河中人咸通未進士王凝辟置幕府召為殿中侍御史不忍去昭宗景福中拜諫議大

夫不赴圖本居中條山王官谷有先人田廬遂隱不仕作亭觀素室悲書唐節士文人名亭曰休休作文以見志後聞哀帝被弑圖不食卒有一鳴集三十卷行於世

五言律詩

早春

傷春仍客處病起却花朝草嫩侵沙長水輕著雨消風  
光知可愛客鬢不相饒早晚丹丘伴飛書下見招

七言絕句

漫書

長擬求閒未得閒又勞行役出秦關逢人漸覺鄉音異  
却恨鶯聲似故山

琢意過  
巧而小

羅隱  
字昭諫餘杭人隱居池之梅根浦自號江東生工詩長於詠物咸通中累舉不第僖宗光啟中錢鏐

辟為從事節度判官副使梁祖以陳議召不行開平  
中魏博羅紹威推為叔父表授給事中年八十餘卒  
餘杭有甲乙集十卷  
傳于世子曰塞翁

五言律詩

九江早秋

雨過晚涼生樓中枕簟清海風吹亂水巖磬落孤城百  
歲幾多日四蹄無限程西隣莫高唱俱是別離情

五六語  
格最下

附效玉臺體曉夢通簾押  
春寒逼酒鑪甚是佳句

七言律詩

中元夜泊淮口

木葉迴飄水面平，偶停孤棹已三更。  
秋涼霧露侵燈下，夜靜魚龍逼岸行。  
歌枕正牽題柱思，隔樓誰轉遶梁聲。  
錦帆天子狂魂魄，應過揚州看月明。

三四氣格  
逼出盛唐

憶九華

九華巉崿蔭柴扉，長憶前時此息機。  
黃菊倚風村酒熟，

綠蒲低雨釣魚歸  
干戈已是三年別  
塵土那堪萬事違  
回首佳期恨多少  
夜闌霜露又沾衣

所思

西上青雲未有期  
東浮滄海去何遲  
酒闌夢覺不稱意  
花落月明空所思  
長恐病侵多事日  
可堪忙過少年時  
鬪鷄走犬五陵道  
惆悵輸他輕薄兒

風格  
挺挺

七言絕句



柳

灞岸晴來送別頻  
相偎相倚不勝春  
自家飛絮猶無定  
爭解垂絲絆路人

為柳作  
楚調

淚

逼臉橫頤咽復勻  
也曾讒毀也傷神  
自從魯國潛然後  
不是奸人即婦人

雖非雅體  
當是名言

羅鄴

餘杭人與兄隱虬齊名世稱三羅咸通中舉進士不第有集一卷或云父則為鹽鐵小吏有三子俱

以文學顯鄴尤長七言詩

七言律詩

費拾遺書堂

滿袖歸來天桂香  
紫泥重降舊書堂  
自憐葦帶同巢許  
不駕蒲輪佐禹湯  
怪石盡涵千古秀  
奇花多吐四時芳  
何人更肯追高躅  
唯有樵童戲薜牀

五六  
韻俚

留題張逸人草堂

長懸青紫與芳枝  
塵路無因免別離  
馬上多於在家日  
樽前堪惜少年時  
關河客夢還鄉後  
雨雪山程出店遲  
却羨高人此中老  
軒車過盡不知誰

三四  
足惋

七言絕句

渡江有感

岸落殘紅錦雉飛  
渡江船上夕陽微  
一枝猶負平生意

歸去何曾勝不歸

出都門

青門春色一花開  
長到花時把酒盃  
自覺無家似潮水  
不知歸處去還來

宮中

芳草長含玉輦塵  
君王遊幸此中頻  
今朝別有承恩處  
鸚鵡飛來說似人

放鷓鴣

好傍青山與碧溪  
刺桐毛竹待雙栖  
花時遷客傷離別  
莫向相思樹上啼

秦韜玉

七言律詩

春遊

選勝逢君叙解攜  
思和芳草遠烟迷  
小梅香裏黃鸝轉  
垂柳陰中白馬嘶  
春引美人歌徧熟  
風牽公子酒旗低  
早知有此闔身事  
悔不前年住越溪

崔魯

僖宗廣明進士  
有無機謀四卷

七言絕句

華清宮

草遮回磴絕鳴鑾  
雲樹深深碧殿寒  
明月自來還自去  
更無人倚玉闌干

說盡

于鄴

五言律詩

江樓春望

樓下長江路舟車晝不閒  
鳥聲非故國春色是他山  
一望雲復水幾重河與闊  
愁心隨落日萬里各西還

三四是少陵小品

五言絕句

高樓

遠天明月出照此誰家樓  
上有羅衣裳涼風吹不秋

崔塗

字禮山僊宗光啟四年  
鄭貽同榜進士詩一卷

五言律詩

夕次洛陽道中

秋風吹故城，城下獨吟行。  
高樹鳥已息，古原人尚耕。  
流年川暗度，往事月空明。  
不復歎岐路，馬前塵夜生。

三四  
清老

南山旅舍與故人別

一日又欲暮，一年看即殘。  
病知新事少，老別舊交難。  
山盡路猶險，雨餘春却寒。  
那堪試迴首，烽火是長安。



五六  
標勁

過昭君故宅

以色靜胡塵名還異衆嬪免勞征戰力無愧綺羅身骨  
竟埋青塚魂應怨畫人不堪逢舊宅寥落對江濱

三四自負  
却帶諷情

孤鴈

幾行歸去盡片影獨何之暮雨相呼失寒塘獨下遲渚  
雲低暗度關月冷遙隨未必逢繒繳孤飛自可疑

秋夕與友人同會

章句積微功  
星霜二十空  
僻應如我少  
吟喜得君同  
月上僧歸後  
詩成客夢中  
更聞栖鶴警  
清露滴青松

五六  
徑

巫山廟

雙黛儼如顰  
應傷故國春  
江山非舊主  
雲雨是前身  
夢覺傳詞客  
靈猶福楚人  
不如千載後  
何處又為神

三四  
擔當  
語復流活

喜友人及第

孤吟望至公已老半生中不有同人達兼疑此道窮只  
應才自薄豈是命難通尚激搏溟勢期君借北風

崔塗五律  
氣格稜稜

七言律詩

途中感懷寄青城李明府

鱗鬣摧殘志未休壯心翻是此身讐併聞寒雨多因夜  
不得鄉書又到秋耕釣舊交吟好憶雪霜危棧去堪愁

如何只是三年別君著朱衣我白頭

三四宛轉流  
利情思重重

附春夕 水流花謝兩無情送盡東風過楚城蝴蝶  
夢中家萬里子規枝上月三更故園書動經年別華  
髮春惟滿鏡生自是不歸歸便得五湖烟景有  
誰爭 此蝴蝶子規是崔塗面目語要渠何用

七言絕句

湘中謠二首

蒼山遙遙江潏潏路傍老盡沒閒人王孫不見草空綠  
惆悵波頭春復春

烟愁雨細雲溟溟  
桂蘭香老三湘清  
故山望斷不知處  
鷓鴣隔花時一聲

上巳日

未敢分明賞物華  
十年如見夢中花  
故人過盡衡門掩  
獨自凭欄到日斜

感花

繡靴香韞夜不歸  
少年曾惜最紅枝  
東風一陣黃昏雨  
又到繁華夢覺時

澗松

寸寸凌霜長勁條  
路人猶笑未干霄  
南園桃李雖堪羨  
爭奈春殘又寂寥

方澤

七言絕句

武昌阻風

江上春風阻客舟  
無窮歸思滿東流  
與君盡日閒臨水  
貪看飛花忘却愁

忘字似不  
若減字佳

宋榮

七言律詩

有贈

莫道粧成斷客腸  
粉胸錦手白蓮香  
烟分頂上三層綠  
劍截眸中一寸光  
舞勝柳枝腰更軟  
歌嫌珠貫曲猶長  
雖然不似王孫女  
解愛臨邛賣賦郎

獨四語佳  
五六最厭

七言絕句

贈妓

試共卿卿瑣語粗  
畫堂速遣侍兒呼  
寒肌不耐金如意  
白獺為膏郎有無

章碣

錢唐人孝標之子登僖宗乾符進士第後竟流落不知所終有集行

浙西送杜晦侍御入關

紫詔徵賢發帝聰  
繡衣行處撲香風  
鶚歸秦樹幽禽散  
星出吳天列舍空  
捧日思馳仙掌外  
朝宗勢動海門中



鞭梢所拂三千里多少諸侯合避驄

七言絕句

焚書坑

竹帛烟銷帝業虛關河空鎖祖龍居坑灰未冷山東亂  
劉項元來不讀書

李穀

七言律詩

浙東罷府西歸道經吳中廣文張博士皮先輩

陸秀才皆以雅篇相送不量荒詞亦用酬別

豈有頭風筆下痊浪成蠻語向初筵  
蘭亭舊址雖曾見柯笛遺音更不傳  
照耀文星吳分野留連花月晉名賢  
相逢只恨相知晚一曲驪歌又幾年

高蟾

河朔人按唐登科記進士有兩高蟾則僖宗乾符二年登第者是也唐藝文志云昭宗乾寧間為御

史中丞  
詩一卷

七言絕句

初落第

天上碧桃和露種日邊紅杏倚雲栽  
笑容生在秋江上  
獨向春風怨未開

金陵晚眺

曾伴浮雲歸晚翠  
旋倍落日泛秋聲  
世間無限丹青手  
一片傷心畫不成

唐求

五言律詩

題鄭處士隱居

不信最清曠及來愁已空數點石泉雨一溪霜葉風業  
在有山處道成無事中酌盡一樽酒病夫顏亦紅

鄭谷

字守愚袁州宜春人僖宗光啟二年進士授京兆  
鄠縣尉後為都官郎中退希仰山書堂卒有宜陽

集三卷號雲臺編谷幼有名譽司空圖見  
而奇之因拊其背曰當為一代風騷主

五言律詩

旅寓洛南村舍

村落清明近鞦韆稚女誇春陰妨柳絮月黑見梨花白  
鳥闌魚網青帘認酒家幽棲雖自適交友在京華

月黑見梨花

語堪作圖

### 題進士王駕郊居

前山微有雨，永巷淨無塵。  
牛卧籬陰晚，鵲鳴村意春。  
時浮應寡合，道在不嫌貧。  
後徑臨陂水，菰蒲是切鄰。

四語佳

附鵲鵲 暖戲烟蕪錦翼齊  
品流應得近山鷄  
雨昏青草湖邊過  
花落黃陵廟裏啼  
游子乍聞征袖濕  
佳

人纔唱翠眉低  
相呼相喚  
湘江澗苦竹叢  
深春日西

附侯家鷓鴣  
江天梅雨濕江蘺  
此處烟香是此時  
苦竹嶺無歸去日  
海棠花落舊棲枝  
春宵思極蘭燈

暗脫月啼多錦幕垂唯有佳人憶南國殷勤為爾  
唱愁辭二詩絕不見佳知詠物之難成名之易  
附燕 年去年來來去忙春寒烟暖渡瀟湘低飛  
岸和梅雨亂入紅樓揀杏梁閒几硯中闕水淺落花  
徑裏得泥香十言萬語無人會又逐流鶯過短牆

五言絕句

感興

禾黍不陽艷競栽桃李春翻令力畊者半作賣花人

七言絕句

曲江春草

花落江堤簇曉烟  
雨餘草色遠相連  
香輪莫輟青青破  
留與游人一醉眠

淮上與友人別

揚子江頭楊柳春  
楊花愁殺渡江人  
數聲風笛離亭晚  
君向瀟湘我向秦

席上貽歌者

花月樓臺近九衢  
清歌一曲倒金壺  
座中亦有江南客  
莫向春風唱鷓鴣

文昌寓直

何遜空階夜雨平  
朝來交直雨新晴  
落花亂上花塼上  
不忍和苔踏紫英

十日菊

節去蜂愁蝶不知  
曉庭還繞折殘枝  
自緣今日人心別  
未必秋香一夜衰

響亮故佳凡

寫情忌闕

唐詩鏡卷五十三